

Haabeel Aur Qaabeel

Taurait : Khilqat 4:1-16

Ādam^(a.s) aur beebī Hawwā ke āpsī silsile se wo haamilā hueñ aur ek laḍke ko paidā kiyā. Beebī Hawwā ne kahā, “Maine Allaah taa’alā kī qudrat se ek bacche ko paidā kiyā hai.” Unhone us laḍke kā naam Qaabeel rakhā.⁽¹⁾ Beebī Hawwā ne phir Qaabeel ke bhaāī Haabeel ko paidā kiyā. Haabeel ne jaanwar charaane kā kaam chunā aur Qaabeel ne khetī karne kā.⁽²⁾ Fasal kī kaṭāāī ke waqt Qaabeel ne Allaah taa’alā ko anaaj kā nazraanā pesh karā.⁽³⁾ Haabeel ne Allaah taa’alā ko nazraanā dene ke liye apnī bheḍoñ ke jhuñḍ se ek bheḍ ko qurbaan kiyā. Unhone bheḍ ke pahale bacche kī qurbaanī dī aur uske jism kā sabse acḥā gosht pesh kiyā.

Allaah taa’alā ne Haabeel aur uskī qurbaanī ko qubul kiyā.⁽⁴⁾ Lekin, Allaah rabbul azeem ne nā hī Qaabeel kī qurbaanī ko qubul kiyā aur nā hī use.^[a] Qaabeel ko is wajah se bahut takleef huī aur wo bahut naaraaz huā.⁽⁵⁾ Allaah taa’alā ne Qaabeel se puchā, “Tum naaraaz kyuñ ho? Tumhaare chehre par udaasī kyuñ hai?”⁽⁶⁾ Tum jaante ho ki agar tum wo karoge jo sahī hai to main tumko bhī qubul kar luñgā, lekin agar tum wo karoge jo sahī naheen hai, to gunaah tumhaare darwaaze par tumhaarā intazaar kar rahā hai. Gunaah tum par qabzā karnā chahtā hai, lekin tumheñ us par haawī honā chaahie.”⁽⁷⁾

Qaabeel ne apne bhaāī Haabeel se kahā, “Chalo khet me chalte haiñ.” Wahaan jā kar Qaabeel ne apne bhaāī Haabeel par hamlā kiyā aur usko qatl kar diyā.⁽⁸⁾ Baad me jab Allaah taa’alā ne Qaabeel se puchā, “Tumhaarā bhaāī Haabeel kahaan hai?” Qaabeel ne jawaab diyā, “Main naheen jaantā. Kyā Haabeel kā kḥayaal rakhnā merī zimmedaarī hai?”⁽⁹⁾ Tab Allaah taa’alā ne Qaabeel se kahā, “Ye tumne kyā kiyā? Suno, tumhaarī wajah se zameen par kḥun girā hai aur wo mujhse cheekḥ-cheekḥ kar fariyaad kar rahā hai.”⁽¹⁰⁾

“Tum par laanat hai aur tumko is jagah se bhagā diyā jaaegā.”⁽¹¹⁾ Ab tum zameen par kuch bhī ugaoge to wo use paidā naheen karegī. Ab is zameen par tumhaare rahne ke liye koī ṭhikaanā naheen aur tum ek jagah se dusrī jagah bhaṭakte phiroge.”⁽¹²⁾

Tab Qaabeel ne Allaah taa’alā se kahā, “Ye sab mere bardaasht se baahar hai.”⁽¹³⁾ Tu mujhe apnī rahamat se dur kar rahā hai, to ab main nā hī tere qareeb ā paauñgā aur nā hī merā koī ghar hogā. Mujhe ek jagah se dusrī jagah bhaṭaknā paḍegā aur main jisse bhī miluñgā wo mujhe qatl kar degā.”⁽¹⁴⁾ Tab Allaah taa’alā ne Qaabeel se kahā, “Agar koī tujhe maaregā to us insaan ko saat gunā zyaadā sazā milegī.” Tab Allaah taa’alā ne Qaabeel ko ek kḥaas nishaan diyā taaki koī use nā maare.⁽¹⁵⁾ Qabeel Allaah taa’alā kī rahamat se dur mulk Naad kī zameen par bas gayā.⁽¹⁶⁾

[a] Quraan majeed : Al-Maaidā 5:27: “Nā hī Qaabeel kī qurbaanī ko qubul kiyā aur nā hī use.”